

Date – 01/07/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Larsap General (Rtd) Vijay Kumar Singh a'n Mizoram Peace Accord chu khawvel puma inremna thuthlung entawntlak tak ti a hriat a nih thu sawiin, Mizoram mipuite chu hlut thiam chhawmnung zel turin a chah.
2. Online hmanga taxi leh auto-rickshaw koh theihna tura duan MizoTaxi mobile app chu vawiin atanga hman tan tur a ni a, MizoTaxi mobile app-ah hian lirthei 306 an in register tawh.
3. Viksit Bharat-Guarantee for Rozgar and Ajeevika Mission (Gramin) [VB-G RAM G] Act, 2025 chu vawiin atangin rampumah hman tan a ni
4. Prime Minister Narendra Modia chuan nimin khan sawrkar laipui Ministry hrang hranga Secretary te nen New Delhi-ah an thukhawm.

<><><>

GOVERNOR : PEACE ACCORD RUBY JUBILEE

Larsap General (Rtd) Vijay Kumar Singh a'n Mizoram Peace Accord chu khawvel puma inremna thuthlung entawntlak tak ti a hriat a nih thu sawiin, Mizoram mipuite chu hlut thiam chhawmnung zel turin a chah.

Remna Ni kum 40 tlin lawmna Ruby Jubilee puala Zoram Research Foundation leh Aijal Club tangkawp buatsaih, "From the Frontlines of '66 to 40 Years of Peace" tih thupui hmanga hun hman a telpui na ah Mizoram remna chu khawvel pumna thuthlung entawn tlak ani a ti a, inremna a awm theih nan mitinin tha an thawh avangin Mizo mipuite ta ani tih sawiin Mizo mipuiten hlut thiam turin a chah a ni.

Larsap chuan Underground ten inremna hmanga mipui sawrkar an zawm hnu kum 40 lai India rama state ralmuang berte zinga mi an ni ta chu ropui a tih thu sawiin, remna leh muanna hnuaiah mipui sawrkar leh hmasawnnate chak takin a kal thei thin a ti bawk.

Remna Ni Ruby Jubilee pual hian Larsap chuan "The Case Study of the Enduring Legacy of the Mizo Peace Accord" tih project a tlangzarh bawk.

(DIPR)

<><><>

EDUCATION DEPT

School naupang Aadhaar enrolment leh update processing fee lak anih chungchanga Consumer Union, Mizoram ten thuchhuah chu Directorate of School Education, Government of Mizoram chuan an sawifiah a, school naupang kum 5 leh kum 17 inkar tana Aadhaar enrolment leh siamthatna kalpuitu zinga fee lo la te hi chhui mek an nih thu an tarlang.

Directorate of School Education chuan Unique Identification Authority of India (UIDAI) chuan state tinah Aadhaar enrolment hi an kalpui thin a. School Education Department chuan Samagra Shiksha hnuaia BRC leh CRCC staff thenkhat tlawmngaite hmangin Aadhaar Enrolment leh Mandatory Biometric Update (MBU) camp a buatsaih thin a. Hlawh dang nei lova an kal chhuah thin avangin New Enrolment leh update-na atan per head-in UIDAI atangin lak phalna an nei thin a. Enrolment fee hi an ei leh in, vah velna leh lehkha etc. mamawh phuhrukna atan hmangin, Department-ah chhung lut tura phut an ni ngai lo an ti.

UIDAI chuan kum 2025 September 29 khan Aadhaar enrolment chungchangah naupang kum 5-17 chu kum khat chhung (October 2025 - October 2026) a thlawna Aadhaar enrolment leh update ti turin thu chhuah a siam a, Directorate of School Education chuan a thlawna kalpui tawh tur ani tih October 17, 2025 khan District tinte hnenah hriattirna a lo pe chhuak tawh an ti. District thenkhatah UIDAI thu kalh a naupang enrolment leh update processing fee la an awm ni-a Consumer Union-in thuchhuah an siam a ngai hi School Education Department chuan pawl a ti a, fee lo la rute hi chhui mek a ni, an ti.

Aadhaar Enrolment tih thar leh Update hi tihmakmawh a nih avangin School Education Department chuan kalpui zel a tum a, hemi kawngah hian theihtawpa mi tinte tanpuina leh thawhpuina an ngen bawh a ni.

(DIPR)

<><><>

HEALTH MINISTER

Health Minister Pi Lalrinpuii'n rampum huapa Health Department chungchang sawihona ah Mizoram hriselna kawnga hmalakna hrang hrang sawiin Mizoram mipui zawng zawng huapa State Sawrkar in MUHCS hlawhtling taka kalpui ani a ti.

Vigyan Bhawan, New Delhi a - 16th Conference of the Central Council Health & Family Welfare ah Health Minister Pi Lalrinpuii chuan Mizoramin Sustainable Development Goals tihlawhtling tura a hmalakna kalzelah Neonatal Mortality rate leh under 5 Mortality rate pawh 9 leh 18 ve ve ah an tlakthlak tawh thu te, Immunisation coverage pawh state data ang chuan 90% lai an nih thu te, non communicable disease chungchangah nasa taka inzirtirna leh damdawi semna kalpui a nih thu te, TB rinhlelhawm te X ray hmanga endik tam lamah pawh India ram pum huapa titha ber an nih dan te, Quality service pekchhuahna tur kawngah pawh state chhunga health facilities 121 laiin NQAS certification an neih tawh thu te, Niti Ayog in tehna hrang hrang a siam hmanga Aspirational District te a endikna ah Health & Nutrition sector ah Mamit district chuan India ram puma titha 3 na a hauh dan sawiin Urban Wellness Centre zawng zawngah esushrut clinic System hman vek a nih thute a sawi a. Mi rethei zawkte tan chauha Central Sawrkar siam ABPMJAY chu convergence hlawhtling taka kalpuiin, Mizoram mipui zawng zawng huapa State Sawrkar in MUHCS hlawhtling taka a kalpui chhoh dan a tarlang bawk.

He hunah hian Union Health Minister JP Nadda pawhin thusawiin, tunhma lama damlo enkawlina - curative lam chauh ngaih pawimawh thin chu - Preventive, Curative , promotion, palliative leh rehabilitative lam kawnga Sawrkarin ke a pen tawh thu a sawi a. India ram chuan independence a hmuh atanga Kum 100 na - kum 2047 ah chuan Developed Country a nih theihna turin Vikshit Bharat 2047 goal pawimawh tak a siam a. He hmachhawp hi mipui hriselte tello chuan tihlawhtlin theih anih loh avangin mipuite hriselna hi Sawrkar chuan a ngaih pawimawh berte zing ami a nih reng tur thu a sawi.

(DIPR)

<><><>

MIZOTAXI APP

Online hmanga taxi leh auto-rickshaw koh theihna tura duan MizoTaxi mobile app chu vawiin atanga hman tan tur a ni a, MizoTaxi mobile app-ah hian lirthei 306 an in register tawh.

Mizoram State Transport Authority sawi danin nimin tlai dar 3:00 thlang khan four wheeler taxi 143, two wheeler taxi 159 leh autorickshaw 4 te chu MizoTaxi mobile app-ah hian in register an awm tawh a, in-register duhte tan remchan zawkna a nih beiseiin June thla chhunga holiday leh Inrinni-ah pawh Mizotaxi Office an hawn thu an sawi a ni.

Mizoram State Transport Authority sawi danin hun tiam chhunga MizoTaxi a mipui mamawh khawp lirthei inziak lut an awm lo a nih chuan two-wheeler taxi 300, four-wheeler taxi 200 bakah autorickshaw, Aizawl City chhunga domain tinah 10 theuh permit pek chhuah phawt a nih tur thu STA thuchhuah chuan a tarlang a ni.

Taxi-a eizawngtute pawl pathum - Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owner Association (ADAROA) chuan sorkarin Online application hmanga taxi leh auto-rickshaw koh theihna tura duan, Mizo Taxi mobile application chu an dodal chhunzawm zel a, an duhdan chu sorkarin a ngaihtuah tha a nih loh chuan court thlen an tum tih an sawi a ni.

Hemi chungchanga Akashvani Aizawl News zawhna chhangin, ATTA Vice President KC. Lalchawimawia chuan Mizo Taxi app-a rate zat an dah te chu kilometre inang reng pawh rate zat a inang lo hle a, hei bakah hian a metre an dah pawh a dik lo hle a ti a. Mipui leh taxi khalhtute chhiah chawi tura an siam pawh a sang an tih thu a sawi baw.

Byte

Hetihlai hian State Transport Authority (STA) hotute chuan Akashvani Aizawl News zawhna chhangin tun dinhmunah Taxi-

a eizawngtu pawl tangrual te thil duh chungchang chu ngaihtuah
that tumna a awm rih lo tih an sawi.

(DIPR)



ADVISER TO CM

Adviser to CM Pu H. Ginzalala’n sawrkar hmasawnna hnathawh hrang hrangte chu mipuite tana chhawr tangkai theih tura tha ni turin sawrkarin a duh tih a sawi.

Neihdawn khaw tana Road Side Market sak tur a enfiahna ah he thu hi sawiin Pu Ginzalala chuan hna tha leh rin tlak kum tam daih tur sak anih theih nan Khawtlang leh sawrkar tanrual a pawimawh thu sawiin hna tha lo leh fel lo pumpelh turin thawktute a chah a, hmasawnna hnathawh chu mipui tam zawkin an chhawr theih nan theihtawp chhuah a pawimawh tih sawiin Road Side Market (Rural Haat) chu NABARD atanga fund dawn niin ATMA, Champhai District chu Implementing Agency tur an ni tih a sawi.

(Hruaia, PTC Champhai)

<><><>

KOLASIB DC

Kolasib Bawrhsap Pu H. Dolianbuaia'n Khualzinte mit la tur khawpa khawpui mawi leh fai ni tura tan lak a pawimawh thu a sawi.

Nimina Kolasib Bawrhsap Bangla-ah Kolasib khawpui mawina tur pangpar khawina leh leitha, MHIP Sub-Hqrs Kolasib huamchhunga veng hrang hrangte hnenah semna hun hman a ni a. Kolasib Bawrhsap chuan Kolasib chu khualzin tam tak ten an paltlang thin khawpui a nih thu a sawi a. Khualzinte mit la tur khawpa khawpui mawi leh fai nih a chakawmin a tul hle a ti a. Pangpar khawina tura ngaihtuahna sengtute chungah lawmthu sawiin, hei hi a bultanna chauh a la nih thu a sawi a. Kolasib khawpui huam chhunga sawrkar hmunhmate pawh phak ang tawka chei that leh tuai hnum a tum thu sawiin, he hmalakna dawngtu zawng zawngte chu khawpui a lo mawi zel theih nan thahnemngai taka tang turin a fuih a ni.

DC chuan faina kawngah Kolasib khawpuiin hma a sawn theih nan Village Council (VC) te mawhphurna pek an nih thu a sawi a. Ruihhlo do kawngah YMA te hma la tura beisei an nih rualin, khawpui mawina kawnga hma la turin MHIP te chu mawhphurna pek an nih thu a tarlang a. Heng mawhphurna hrang hrangte hi thlahthlam lova thahnemngai taka bawhzui zel turin kalkhawmte a chah a ni. Kumin December thlaah hian 'Kolasib Night' buatsaih a nih tur thu sawiin, khawpui mawina tura pangpar khawi tha te, ruihhlo dona kawng leh veng fai inelnaah te lawmman sem tum a nih thu a tarlang baw.

(Andrew PTC Kolasib)

<><><>

SOLID WASTE MANAGEMENT SYSTEM

Lawngtlai bawrhsap Pu Donny Lalruatsanga chuan 'Solid Waste Management System' chu enfiahin faina leh thianghlimna kawngah pawimawh tak anih thu a sawi.

Bawrhsap chuan 'Solid Waste Management System' chu Faina leh thinghlimna kawngah Lawngtlai District- tana sulsutu pawimawh tak a nih tur thu sawiin, hnathawh hrang hrangte chu uluk taka vil reng a nih thu a tarlang a. Mipuiten an mamwhna hriaa, chak leh tha taka hnathawh bakah a hun taka zawhfel a tul hle a tih a sawi a. Sawrkar hmalakna kawng hrang hrangah tha tak, rintlak leh huntiam chhunga zawh a nih theih nan contractor - te pawh theihtawp chhuah zel turin a chah nghal bawk.

Solid Waste Management System, Lawngtlai hi Urban Development & Poverty Alleviation (UDPA) hnuaia sak niin Hnathawh hi kum 2024, October- khan tan a ni a, kum hnih chhunga zawh fel tura ruahman a ni. Solid Waste Management System, ah hian - Wet Waste Composting Centre, Dry Waste Composting Centre, Site Office cum Staff quarters, Sanitary Landfill leh a dangte a awm dawn a. Solid Waste Management System, Lawngtlai hi KMMTP kawngpui Phaikhangmual a awm niin, a sak hna thawktu hi Lalfamkima, Aizawl a ni a, Tunah hian 80% zawhfel tawh a ni.


(Lalngheta Ralte PTC Lawngtlai)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



VB G RAM G

Viksit Bharat-Guarantee for Rozgar and Ajeevika Mission (Gramin) [VB-G RAM G] Act, 2025 chu vawiin atangin rampumah hman tan a ni a. Union Rural Development Ministry sawidanin he dan tharah hian kumkhatah ni 125 inhlawhna siam a ni tawh dawn a. Hei hian thingtlanga chengte dinhmun a tihthat phah ngei dawn a. Kan correspondent sawidanin kumin sawrkar tangka kumah hian VB-GRAM G atan hian cheng vaibelchhe 95,692 dah a ni. Puan tawh angin VB G RAM G hi hun rei tak lo hman tawh Mahatma Gandhi National Rural Employment Guarantee Act (MGNREGA),2005 thlakna tur a ni a.

(Newsonair)

><><>

PM

Prime Minister Narendra Modia chuan nimin khan sawrkar laipui Ministry hrang hranga Secretary te nen New Delhi-ah an thukhawm a. He thutkhawmah hian thupui pahnih ngaihtuah a ni a. Dan zam thenkhat thlahdulna tur Deregulation leh sumdawnna kawnga awlsamna Ease of Doing Business leh Ease of Living chungchang an sawiho a. Prime Minister Modia chuan sawrkar hmalaknaah department bil hmalakna thenkhat thendarha sawrkar pum anga hmalakna tur chungchang a sawilang a. Ruahmanna leh thawhhona pawimawh zia sawiin PM GatiShakti chu department te thawhhona leh thutlukna siam kawnga pawimawh tak anih thu a sawi a. Secretary te chu mipuite nunah sawrkar scheme ten hna an thawh dan thlur uluk turin a chah bawk a ni.

(Newsonair)

<><><>

FIFA WC

FIFA World Cup 2026 Round of 32 inkhelah nizan khan Norway chuan 2-1 in Ivory Coast an hneh a. Inkhel dangah France-in goal thum faiin Sweden an hneh bawk. Tunah hian World Cup thlengtu ram pathum zinga pakhat Mexico leh Ecuador te an inkhel mek a. Zanin dar 9.30 ah team ngaihven hlawh England leh DR Congo te an inkhel bawk ang.

(Newsonair)

<><><>